



Stigao revizorski izvještaj o IDDEEA-i

I SIPA češlja nabavku dokumenata

Jozić: Izvještaji upućeni Tužilaštvu BiH



U Tužilaštvu BiH potvrđeno nam je da poduzimaju određene aktivnosti na predmetu koji se odnosi na štampanje ličnih dokumenata

Pripadnici Agencije za istrage i zaštitu (SIPA) zaprimili su prije nekoliko dana od Ureda za reviziju institucija BiH izvještaje za sedam bh. institucija koje su dobile mišljenje s rezervom.

Među njima je i Agencija za izdavanje identifikacionih dokumenata BiH (IDDEEA), koja se našla u središtu afere sa štampanjem ličnih dokumenata teške 104 miliona

KM, koju su razotkrili državni revizori, potvrđeno nam je jučer u SIPA-i.

- Predmetni izvještaji još 8. jula 2014. godine dostavljeni su Tužilaštvu BiH na daljnje postupanje. SIPA će nakon planskog postupanja u svakom konkretnom slučaju dostaviti odgovarajuće izvještaje Tužilaštvu BiH - rekla nam je jučer Kristina Jozić, službenica SIPA-e.

Također, iz ove agencije nezvanično saznajemo da oni, neovisno o naredbama Tužilaštva BiH, rade svoj dio provjera u predmetu koji se odnosi na IDDEEA-u.

S druge strane, u Tužilaštvu BiH potvrđeno nam je jučer da poduzimaju određene aktivnosti na predmetu koji se odnosi na štampanje ličnih dokumenata.

- Sve što smo dobili od

revizora u predmetu IDDEEA-e već se analizira i provjerava. Ispitat ćemo je li bilo nepravilnosti te u zavisnosti od toga odlučiti naše daljnje korake. Uglavnom, Tužilaštvo će sve dobro provjeriti - rečeno nam je u ovoj instituciji.

O nezakonitostima je prva progovorila zastupnica SDS-a u Parlamentu BiH Aleksandra Pandurević, ko-

ja je, pozivajući se na revizorski izvještaj o IDDEEA-i, navela da je riječ o velikoj aferi koja povezuje šefove SDP-a i SNSD-a u njihovim nelegalnim poslovima putem firme „Milbauer“ i „Nites“. U izvještaju revizora navodi se da je „Milbauer“ dobio posao bez objave tendera i da je on realiziran putem pregovaračkog postupka. **M. Aš.**